

haberet, populo miseriam allaturus esset, caput præcidere statuens, ensem arripuit.

52. Atque caput ejus, cujus barba scintillis adusta erat, loti instar, cujus folia frigore marcida sunt, de cervice quasi de caule abscidit.

53. *Súdrus* cum ab ipso rege punitus esset, proborum viæ particeps factus est, non vero propter castigationes suas, vel durissimas, quæ viam illi præscriptam egrediebantur.

54. *RAGHUIDARUM* princeps vero convenit *AGASTYAM*, eximie splendentem, qui in via se ei ostendit, veluti tempus autumnale cum luna conjungitur.

55. Ille, e testa natus, dedit ei ornatum, cœlicolis dignum, ab Oceano, quem biberat, pro redemptionis pretio acceptum.

56. Hunc accipiens brachio suo, quod *SÍTÆ* collo non occupatum erat, reversus est *RÁMAS*, sed ante eum *Bráhmaṇi* filius mortuus in vitam rediit.

57. *Bráhmaṇus*, cum filio rursus congressus, reprehensionem antea pronuntiatam abire fecit laudibus ejus, qui ab ipso *YAMA* homines defenderet.

58. Illum, qui sacrificii caussa equum dimiserat, *Rákshasorum*, simiorum et hominum principes muneribus cumulabant, veluti nubes pluvia irrigant fruges.

59. Adibantque eum e diversis plagis acciti magni vates, qui non terrestres solum sed cœlestes etiam regiones reliquerant.

60. Per hos, qui prope urbem commorabantur, *Ayodhya* urbs, quattuor portis quasi oribus instructa, splendebat veluti *BRAHMANIS* corpus, cum modo homines creasset.

61. *SÍTÆ* derelictio etiam laudanda erat; nam marito, qui in conclavi *Prágvansa* appellato habitabat, neque aliam uxorem habebat, illa auro ficta uxor erat.

62. Tum incepit sacrificium, majore apparatu quam quem leges poscebant; ubi *Rákshasi*, alias cærimoniarum turbatores, custodes erant.